

牧齋初學集

二六



牧齋初學集卷第八十六



題跋四

書金陵舊刻法寶三書後

金陵少宗伯殷秋崖先生手訂楞嚴解十卷宋
錄華嚴合論爲約語四卷又得宗鏡會要於長
干精舍鏤梓行世又七十有餘年而滇南陶仲
璞太守獲其版於公之諸孫將募送嘉興經藏
以廣流通而屬余書其事當嘉靖中士大夫之
崇信佛乘者公與故太宰陸莊簡公爲最陸以
弘護金湯爲能而殷以精研性相爲要皆法門

龍象自具金剛眼睛者近世魔禪橫行聾叅啞
證瞎棒胡喝世尊四十九年所說彼將束之高
閣屏爲故紙而何有於此三書乎宰官長者影
慕禪宗互相唱歎以爲甚難希有經所識佛法
將滅魔子出家師子身中蟲還食師子肉正爲
此輩授記也今者狂猷少息病根未除正須昌
明宗教以扶元之藥治狂易之症譬如奴寇交
訐生民塗炭必差擇兵將儲侍糧食然後可以
爲撲滅之計欲救魔禪則此三書者亦佛法之
資糧兵食也佛言烏洛迦蛇最毒嘗患毒熱以

身遶旃檀香樹其毒旋息魔禪如毒蛇三書如
旃檀香樹流布津梁此末法中第一義諦世豈
無如陸殷兩公深心塵刹者乎仲璞爲龍湖高
足弟子而時時抵齒於三峯禪余嘗以鰥國解
衣諷之今觀其沈酣於三書汲汲然歡喜讚歎
知其眼光爍然不爲波旬隻手所障也喜而爲
之證明如此癸未正月聚沙居士書

跋傳文恪公大事狂言

近代館選丙戌己丑爲極盛諸公有講會研討
性命之學丙戌則袁伯修蕭允升王則之己丑

則陶周望黃昭素董思白及文恪公幅巾布衣
以齒敘不以科敘詞林至今以爲美譚文恪公
溫文靜退光風淑氣熏然襲人不以講學樹壇
墀而其學視諸公爲尤精每謂昔人移頭換面
是學問中穿窬手於單傳直指深信不疑然實
死心於儒門乃能穿穴逗漏打破漆桶非如今
人影掠話頭從鬼窟中作活計也狂言謂大慧
大悟一十八遍小悟不計其數元晦先生及伊
川橫渠我朝羅整庵雖嘗學禪微有所見安能
透徹如許又謂陽明龍溪尚未了向上一著獨

知一念禪家謂之獨頭無明蓋無量劫來生死
本也須知有向上事將此生死根本轉爲涅槃
妙智陽明云無聲無臭獨知時此是乾坤萬有
基認此爲極則毫釐千里矣此公之心學也考
公之爲人繩趨矩步進寸退尺作省心記記過
差以自省曰平生亭亭楚楚以丈夫自雄乃爲
百欲作臧獲驅之禽獸之羣又云今之譚禪者
皆宗趙大洲只貴眼明不貴踐履之說終日談
玄說妙考其立身制行辭受進退之際無一毫
相應者乃反貶剝周程豈知彼在塔中安坐而

我乃遙說相輪耶因病發藥箴砭乾慧口鼓之
流可謂至矣讀公書正宜於此處著眼庶可謂
學佛作家不負吾師一片老婆心也

跋雪浪師書黃庭後

余少習雪浪師見其御鮮衣食美食譚詩顧曲
徒倚竟日竊疑其失衲子本色丁未冬訪師於
望亭結茅飯僧補衣脫粟蕭閒枯淡了非舊觀
居無何而示寂去矣師臨行弟子環繞念佛師
忽張目曰我不是這箇家數無煩爾爾嗟乎師
之本色如此豈余向者號呶兒童之見所能相

其髣髴也哉讀師所書黃庭經當知與五千四
十八卷一切法寶等同無異雖然作如是觀所
謂又是一重公案非師本色矣

跋憨山大師大學綱領決疑

此憨山大師所著大學綱領決疑也大師居曹
溪章逢之士多負笈問道大師見舉子身而爲
說法今年過吳門舉似謙益曰老人游戲筆墨
猶有童心要非衲衣下事也子其謂何某聞張
子韶少學於龜山闕見未發之中及造徑山以
格物物格宗旨言下叩擊頓領微旨晚宋稱氣

節者皆首子韶繇今觀之子韶抗辨經筵晚謫
橫浦執書倚立雙趺隱然視少年氣節殆如雪
泥鴻爪非有得於徑山之深而能然耶然徑山
以物格折子韶而大師欲遍攝今之爲子韶者
願力不同其以世諦而宣正法則一也扁鵲聞
秦人愛小兒卽爲小兒醫今世尚舉子故大師
現舉子身而爲說法何謂非衲衣下事乎子韶
嘗云每聞徑山老人所舉因緣如千門萬戶一
踢而開今之舉子能作如是觀大師金剛眼睛
一一從筆頭點出矣

書宋文憲公壁峯禪師塔銘後

金陵梵刹志載嘉靖元年碧峯寺記云洪武五年壬子勅工部黃侍郎重建先是碧峯禪師奏上建寺請名高皇帝御賜號因以題寺按建寺之年卽禪師示寂之歲也宋文憲碑文立於次年癸丑七月旣望何以不載建寺緣起章明法門盛事耶國初工侍僅黃立恭一人攷之欽錄集洪武二十年五月鞍轡局大使黃立恭於大庖西奉聖旨至二十一年戊辰御製修報恩寺塔記始稱工部左侍郎黃立恭昔本技流

今職工部安得於五年先官工侍耶記稱師棄
髮存鬚出使西洋諸國授爵固辭俗所傳西洋
記稱碧峯同三寶太監下西洋事蓋委巷小人
之語寺記殆承此譌也鄭和等使西洋始自永
樂七年師示寂久矣如有之則文憲於天界曇
公記奉使西域事甚詳何獨略於師耶記又稱
師祈雨靈異爲真人所譖投之水火無損後辭
歸西域已時陞辭期午時出潼關是日以上賜
袈裟遣守關吏奏上師生於乾州名族而曰西
域胡僧示寂金陵茶毗聚寶山而曰辭上西歸

師世壽六十五而記稱 高帝讚碧峯像云年
逾七十幾益又謬矣國初大浮屠惟碧峯最著
流傳神異未易更僕寺記所載皆非實錄他可
知已示現微權與諸法實相無二末法無正知
見往往以神通相眩惑請以文憲塔銘正之
跋善繼上人血書華嚴經後

半塘壽聖禪師藏善繼上人血書華嚴經故學
士承旨宋文憲爲序讚新安有謝陞少連者爲
之跋尾備載此經去來事而曰永明師一轉爲
善繼再轉爲文憲以文憲爲善繼後身誤也文

憲序云無相居士未出母胎母夢異僧手寫是經來謂母曰吾乃永明延壽宜假一室以終此卷母夢覺已居士卽生其贊永明遺像曰我與導師有宿因忽悟三世了如幻此文憲爲永明再來之證也若永明之爲善繼善繼之爲文憲陞之言將安據耶文憲序讚載其門人李嵩鄭淵所刻潛溪後集中蓋文憲未入國朝之作而善繼寫經始於至正二十五年乙巳成於次年丙午文憲生於元至大庚戌計是時五十有七年矣序云今逢勝因頓憶前事文憲殆親見

善繼者安得爲善繼後身乎三世去來如屈信
臂不可思議然以應身信之則後先歷然謝氏
之譌不可不訂也丙辰冬十月過半塘瞻禮是
經因志其後

跋清教錄

清教錄條列僧徒爰書交結胡惟庸謀反者凡
六十四人以智聰爲首宗泐來復皆智聰供出
逮問者也宗泐往西天取經其自招與智聰原
招迥異宗泐之自招以爲惟庸以贓鈔事文致
大辟又因西番之行絕其車馬欲陷之死地不

得已而從之智聰則以爲惟庸與宗泐合謀故以贓鈔誣奏遣之西行也果爾則宗泐之罪自應與惟庸同科聖祖何以特從寬政著做散僧耶豈季潭之律行素見信於聖祖知其非妄語抵謾者故終得免死耶汪廣洋貶死海南在洪武三十二年十二月去惟庸之誅纔一月耳智聰招辭惟庸於十一年已云如今汪丞相無了中書省惟我一人以此推之則智聰之招未可盡信也聞清教錄刻成聖祖旋命庋藏其版不令廣布今從南京禮部庫中鈔得內閣

書籍中亦無之

又

按清教錄復見心招辭本豐城縣西王氏子祝
髮行脚至天界寺除授僧錄司左覺義欽發鳳
陽府槎茅山圓通院修寺住洪武二十四年山
西太原府捕獲胡黨僧智聰供稱胡丞相謀舉
事時隨泐季潭長老及復見心等往來胡府復
見心坐凌遲死時年七十三歲泐季潭欽蒙免
死著做散僧野史稱復見心應制詩有殊域字
觸上怒賜死遂立化於階下不根甚矣田汝

成西湖志餘載見心臨刑道其師訢笑隱語
上逮笑隱而釋之尤爲傳會笑隱入滅於至正
四年而爲之弟子者宗泐也來復未嘗師笑隱
野史之傳說可笑如此

石刻首楞嚴經緣起

新安程生高明少而好學歲乙卯有真靈降於
其室如紫陽桐栢之於楊許者久之辭去有馮
于叶者而告曰余唐李太白也有問焉則如響
多譚名理書畫奇逸無俗筆人以爲真太白也
爲生書首楞嚴經將刻之石以傳而屬余序其